



KENYATAAN MEDIA

3 Sept 2016

PROGRAM DBP-UniMAP SEMARAKKAN SEMANGAT KEMERDEKAAN

Kangar, 3 Sept – Bagi menyemarakkan semangat kemerdekaan sempena Hari Kebangsaan yang ke-59, Universiti Malaysia Perlis (UniMAP) dengan kerjasama Dewan Bahasa & Pustaka (DBP) menganjurkan Program Citra Budaya, Cergas Minda & Malam Puisi Kemerdekaan, di sini.

Antara pengisian program yang berlangsung mulai 1 September itu ialah perlawanan persahabatan, lawatan delegasi DBP ke kampus-kampus UniMAP, malam puisi dan pertandingan ‘woodball’.

Dekan Pengurusan Akademik, Prof Ir Dr Rezuwan Kamarudin berkata penganjuran program sempena hari kebangsaan itu adalah amat dialu-alukan memandangkan perubahan era globalisasi kini semakin menghakis semangat patriotik di kalangan generasi muda.

Katanya, walaupun UniMAP adalah universiti yang berteraskan kejuruteraan namun tidak menghalang universiti itu bagi mengadakan program-program kebudayaan dan kesenian melalui Unit Kebudayaan dan Rekreasi (UKR) serta Pusat Kajian Institusi Raja Malaysia (PKIRM) UniMAP.

“Justeru, penganjuran program bersama ini ibarat pucuk dicita ulam mendatang, dan UniMAP akan terus komited dalam program sebegini agar warisan negara dapat dipelihara,” katanya ketika berucap mewakili Naib Canselor UniMAP di Majlis Malam Puisi Kemerdekaan, di Kampus UniMAP Kubang Gajah, di sini.

Turut hadir, Pengarah Jabatan Dasar dan Penyelidikan DBP, Rusli Abdul Ghani dan Pengarah Pusat Sukan, Suhizaz Sudin.

Pada majlis itu, wakil DBP Rasdi Daud turut mempersembahkan puisi bertajuk Menuntun Si Merdeka karya Awang Sariyan serta Aku Ingin Menciummu Setiap

Hari karya beliau sendiri diikuti Nordin Zainal Abidin menerusi puisi berjudul Merdeka dan Kita hasil nukilannya sendiri.

Wakil UniMAP yang juga Pengarah Unit Penerbitan UniMAP Prof Asiah Sarji mendeklamasikan puisi karya beliau sendiri bertajuk Aduhai Si Tanggung yang bakal diterbitkan penghujung tahun ini.

Selain itu, wakil DBP Rosdi Mat Raqib mendendangkan lagu gubahannya berjudul Si Penghuni Sepi diiringi petikan gitar yang dimainkan sendiri.

Tidak ketinggalan, persembahan tarian dan nyanyian dari Kumpulan Inderasutra UKR UniMAP menjadi penyeri majlis itu.

Dalam majlis berkenaan turut disampaikan hadiah perlawanan badminton yang dijuarai UniMAP manakala bagi permainan damak, DBP menjadi johan.

Delegasi DBP yang terdiri daripada 50 peserta itu adalah Biro Kebudayaan Badan Keluarga, Biro Lawatan & Rekreasi, dan Biro Badan Sukan Keluarga DBP.

Dikeluarkan Oleh :

Aininulniza Mohd Yusof (aininulniza@unimap.edu.my)

Pegawai Perhubungan Media UniMAP

Tel : 04-9885474